

Jedna ekonomska reforma svaka četiri dana

Visoki predstavnik, Paddy Ashdown je danas čestitao članovima Buldožer komisije i njihovim partnerima u državnim i entitetskim vladama i parlamentima na donošenju, u prosijeku jedne ekonomske reforme svaka četiri dana otkako je inicijativa započela, i to brzinom još "neviđenom" u ovoj zemlji.

Četrdesetdeveta reforma koja se odnosi na zaštitu okoline je usvojena u srijedu na sjednici Doma naroda Federacije BiH. Pedeseta reforma vezana za ukidanje monopola Uprave za geodeziju i imovinsko-pravne poslove RS-a koji se tiče premjera zemljišta je trenutno predmet javne debate u RS-u i očekuje se da će Narodna skupština RS-a prihvatiti ovu reformu prije kraja mjeseca.

Visoki predstavnik je istakao da je strategija Buldožer komisije bila radikalno drugačija od sličnih reformskih napora u BiH i drugim zemljama. Prvi put, ekonomske reforme u BiH su pokrenuli poslovni ljudi, a ne političari i birokrati. Ljudi koji najbolje poznaju situaciju u vezi otvaranja novih radnih mjesta i investicija su bili izravno uključeni u uklanjanju pravnih i birokratskih prepreka za ekonomski razvoj. Ljudima koji su dokazali da mogu dobro upravljati preduzećima je data šansa da preporuče reforme koje olakšavaju otvaranje novih radnih mjesta i poslova u ovoj zemlji. "Zamršenost često međusobno kontradiktornih poslovnih propisa čini skoro nemogućim da se vodi profitabilno poslovanje u ovoj državi. Zahvaljujući Buldožer inicijativi, mnogi od ovih propisa koji su onemogućavali otvaranje novih radnih mjesta su uklonjeni." rekao je visoki predstavnik.

Imajući na umu da je Buldožer komisija dala sebi za cilj da sprovede 50 reformi koje su prihvatili parlamenti ili usvojile

vlade u roku od 150 dana, visoki predstavnik je istakao da je bez obzira na rok probijen u par sedmica "brzina reformi bila izvanredna". Naglasio je da je inicijativa rezultirala u prosjeku jednom reformom svaka četiri dana. "To znači da se svaka četiri dana nivo nepotrebne birokracije sa kojom se suočavaju bh. poduzetnici smanjuje; svaka četiri dana poslovanje preko međuentitetske linije razgraničenja postaje lakše; i svaka četiri dana se daje veća vrijednost poslu koji obavljaju preduzeća."

Visoki predstavnik je istakao da budući da su reforme Buldožer komisije oblikovali sami poslovni ljudi i prezentirali ih političkim predstavnicima kroz otvoreni dijalog, one su stvorile novi oblik partnerstva između političkih lidera i privatnog sektora. "Ovaj dijalog je glavni element u stvaranju aktivnog i održivog civilnog društva u BiH", rekao je. "Kroz dijalog koji se razvija u okviru Buldožer procesa, politički lideri, privatni sektor, a i sindikati kroz Buldožer fazu II, će moći da stvore programe dugoročnog ekonomskog razvoja koji će koristiti svima."

Također je dodao da ovaj pristup sa fokusom na poslovanju je bio ključ za postizanje konkretnih rezultata. "Donošenjem reformi kojim se otklanjaju međuentitetske barijere, harmonizacijom zakonodavstva i prenošenjem nekih kompetencija na državni nivo, vlasti su stavile ekonomiju na prvo mjesto. To znači da su i životni standard stavili na prvo mjesto. A to znači da su zapošljavanje i građane stavili na prvo mjesto."